

30. september 2019

UKA2019/39

Aningaasanut inatsimmi konto pingarneq 64.01.05 naapertorlugu inuussutissarsiutitsigut Nunaqarfinnut isorliunerusunullu siuarsaanermik tapiissutinik suliassap ulloq 1.januar.2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartuni ilaasortaq Aqqaluaq B. Egede, Inuit Ataqaatigiit)

Nunaqarfinni isorliunerusunilu inuussutissarsiutinik ineriartortitsineq-mi konto pingarnerup 64.01.05-ip kommuninut nuunneqarnissaanik ulloq 1.januar.2020 aallarnerfigalugu, apeqqutillu tassunga attuumassuteqartut ilanngullugit, Naalakkersuisut peqquneqarnissaat pillugu Inatsisartuni aalajangiiffigisassatut siunnersuummut Inatsisartuni ilaasortamit Aqqaluaq B. Egedemit qaqinneqartumut Siumumiit qutsavigaarput imatullu oqaaseqarfigissavarput.

Nunaqarfinni isorliunerusunilu inuussutissarsiutitsigut aalisarnikkut piniarnikkut takornarialerinikkut aatsitassarsiornikkut immap naasuinik inuussutissarsiornikkut nunalerinikkut inuussutissanillu ineriartortitsinermi aningaasanut inatsit pineqartoq pingaaruteqarluinnarpoq, pisariaqartinneqartullu naapertorlugit immerneqartarnissaa Siumumiit pingatilluinnarparput.

Oqaatigisariaqarparput Nunaqarfiit isorliunerusullu ilaat qajannarsornerup nalaanili inissinneqarsimmata illuliortitsernikkut suliffissuaqarnikkut talittarfeqarnikkut imeqarniarnikkut allatigullu inerisarniarnissaat ajornartut, aammali ilaqarput inerisarneqarnissaminnut periarfissagissaartut suli iluamik inerisarneqanngittsut, Nunaqarfinni isorliunerusunilu aalisarnermik inuussutissarsiornermi annertusisamik suliffeqartitsinissamut periarfissat pillugit Naalakkersuisut nalunaarusiarititaat 2017-ip missaani naammassineqarsimasoq paasissutissanik imaqarluortoq suliniarnermi atorluarneqarsinnaavoq.

Tamakkulu paasissutissat atorluarlugit ullutinnullu naleqqussarlugit minnerunngitsumillu kommuunit, Nunaqarfiit kattuffiat, kattuffiit, peqatigiiffiit, aalisartut, aalisartut sinniisaat, suliffeqarfiit, il.il. allallu attuumassuteqarsinnaasut tamaasa peqatigalugit nutarterisoqarnissaa anguniarneqartariaqarpoq pingaarnersiuinikkut aammalu atorluaanikkut.

Konto pingarneq pineqartoq kommune-nut nuunneqarnissaa Siumumiit piffissaasorinngilarput, pisariaqartitsinerli naapertorlugu immerneqartarnersoq qulaajaasoqarnissaa kissaatigaarput, Naalakkersuisullu inussiarnersumik kaammatorlutigit tamassuminnga suliaqarnissaat.

Taamatut oqaaseqarluta Naalakkersuisut itigartitsinerat taperserparput.

Hermann Berthelsen, Siumut